

He whakapuaki nā te Hui Wānanga mō ngā iwi taketake o te ao me te mate pukupuku:


He rārangi mahi kōtui mō Aotearoa, mō Āhitereiria me ngā whenua o te Moana-nui-a-Kiwa, 19-20 Hui-tanguru 2018

I te marama o Hui-tanguru 2018, tata ki te 150 ngā tāngata nō Ahitereiria, nō te Moana-nui-a-Kiwa, me Aotearoa) i hui ki te whakawhitiwhiti whakaaro, ki te ako ngātahi, otirā ki te pūpū i ngā kaha o te katoa ki te tārei rākau pakari, hei pakanga ki te mate pukupuku i waenga i ō tātou iwi taketake.

I rongo kōrero mātou i te hunga kua ora ake i te mate pukupuku, i ō rātou whānau, i ngā kaiwhakaora mate, i ngā ratonga tautoko, i ngā kaiwhakatakoto kaupapa here, i ngā kairangahau me ngā whakahaere ā-ao. Kei te whakaae rātou katoa ki te pānga nui o te mate pukupuku ki ngā iwi taketake o te Moana-nui-a-Kiwa, o Ahitereiria me Aotearoa. E kore e taea te whakahē i te kōrero, he nui ngā taumata kua kakea, he tino pai te ahunga whakamua o te ārai, o te tautohu, me te rongoā i ngā mate pukupuku maha, heoi rā, ko te wāhi uaua ko te kawe i nga hua o ēnei kitenga hōu ki ngā iwi taketake o tō tātou takiwā o te ao.

E tautoko ana ngā Whenua o Te Ao i ngā mōtika o ngā iwi taketake ki te arataki i ā rātou mahi ake, me ngā mōtika kia noho i roto i te hauoratanga. E ai rā ki te Upoko 24 o te Whakaputanga o ngā Mōtika o ngā Iwi Taketake (2007) "*He whakapuaki taketake tēnei, he mōtika taurite tonu te mōtika o ngā tāngata iwi taketake kia eke ki ngā taumata tiketike rawa o te hauora ā-tinana, ā-hinengaro. Me whai tonu ngā whenua rangatira i ngā huarahi e tika ana i runga i te koronga kia whakatinanatia katoatia tēnei mōtika.*"

Tērā tonu ētahi take mārama ki te titiro atu a te kanohi mō ngā momo mate pukupuku katoa hei whakatika; ko te korenga rautaki ārai mate pukupuku whai hua tērā, ko ngā maioro me ngā uauatanga o te whakauru atu ki ngā ratonga taurima i te mate me ngā ratonga tautoko tērā, ko te noho rerekē o te arotake tōtika i ngā putanga hua mō ngā iwi taketake tērā. He mōtika tūturu tonu tō ngā iwi taketake o Te Moana-nui-a-Kiwa, o Āhitereiria, me Aotearoa kia whai wāhi ki ngā mahi whakawhanake, whakarite kōkiri me ngā rautaki whakaheke i te pānga o te mate pukupuku e pā ana ki a rātou.



Inā rā ētahi o ngā mātāpono e tika ana kia noho hei tāhuhu mō ngā mahi:

- He mōtika taurite tonu te mōtika o ngā tāngata iwi taketake kia eke ki ngā taumata tiketike rawa o te hauora ā-tinana, ā-hinengaro, e ai rā ki te Upoko 24 o te Whakaputanga o ngā Mōtika o ngā Iwi Taketake. He haepapa nui tō ngā Kāwanatanga me ngā rōpū o waho i ngā Kāwanatanga kia whāia ngā huarahi tāpiri katoa e tika ana hei whakapiki i te hokinga ki te ora, mai i te mate pukupuku, i waenga i ngā iwi taketake o tēnei takiwā o te ao.
- Tētahi mahi matua ko te āta tautohu, te whakatikatika mārire hoki i ngā maioro ā-pāpori, ā-tōrangapū hoki e whakataimaha nei i ngā mahi whakapūmau i te hauora i te mate pukupuku mō ngā iwi taketake o tēnei takiwā.
- He ao wairua, he whakapapa, he atuatanga, he tikanga, he reo, he mātauranga tō ngā iwi taketake, ka noho hei manawa-ora mō rātou, mō te taha hauora, me te toi tangata.
- Me mātua noho ko te hautūtanga, te whāinga wāhi, me te waiho i te whakatau take ki aua iwi taketake hei mauri mō ngā hātepe katoa.
- Me tino puta ngā reo, otirā me whakarongo te ao ki te hunga kua tino pāngia e te mate pukupuku, me ō rātou whānau.
- Mā ngā mahi kōtui, me ngā mahi ngātahi i waenga i ngā iwi taketake puta noa i te takiwae ka puta ngā hua o te tautoko tētahi i tētahi, o te kawenga haepapa, o te kawe takohanga, te whakahihiri me te tiritiri i ngā rauemi.
- *Whakapūpūtia mai ō mānuka, kia kore ai e whati.* (Cluster the branches of the mānuka, so they will not break). Mā te mahi ngātahi i runga i te whakaaro kotahi, ka kaha kē ake te whai hua o ā mātou mahi mō te mate pukupuku i waenga i ngā iwi taketake o tō tātou takiwā o te ao.

He aha tā tātou e whakahau nei?

Tēnei mātou te karanga atu nei ki ngā Kāwanatanga o tō tātou takiwā, te Rōpū Hauora o te Ao, te Haporī o te Moana-nui-a-Kiwa (SPC) me ētahi atu whakahaere ā-takiwā kia whakaū i te hira o te ārai i te mate pukupuku i roto i ngā mahi hauora mō ngā iwi taketake o tō tātou takiwā, mā te whakawhanake, mā te whakatinana me te whakapūmau i ngā mahere ārai mate pukupuku e tika ana, tae atu ki te aroturuki me te tuku pūrongo mō aua mahere, e āta poua ana ki roto i ngā mātāpono e whakahuatia ake nei i tēnei whakapuaki.